

29.

COMPETITIO AD AGGREGATIONEM

JUSSU. REGIS OPTIMI ET EX MANDATO SUMMI GALLICÆ UNIVERSITATIS MAGISTRI INSTITUTA, ANNO 1823.

AN PUTREDO NOSOCOMIALIS CUM GANGRÆNA CONFUNDI POTEST? AN EADEM UTRINQUE CAUSA, SIGNUM, PROPHYLAXIS ET MEDELA?

THESIS

Quam, Deo favente, in saluberrimâ Facultate Parisiensi, præsentibus competitionis judicibus, publicis competitorum disputationibus subjiciet et dilucidare conabitur die
anno 1824.

A. C. BAUDELOCQUE,

Doctor Medicus Parisiensis, Academiae regiae Medicinæ Socius adjunctus, etc.

PARISIIS

EX TYPOGRAPHIA MIGNERET,

VIA VULGÒ DU DRAGON, N.º 20.

M. DCCC XXIV.

PRÆSES.	D.	ESQUIROL.
		BOYER.
		DUPUYTREN.
		RICHERAND.
JUDICES	P. et D.	MARJOLIN.
		BOUGON.
		GARDIEN.
		CAPURON.
		RIBES
VICES-GERENTES.	DD.	DENEUX.
		BRESCHET.
		MOREAU.

COMPETITORES.

DD. LECORCHÉ-COLOMBE.
LISFRANC.
J. CLOQUET.

DD. DUBOIS.
BELMAS.
BAUDELOCQUE.

AN PUTREDO NOSOCOMIALIS CUM GANGRÆNA CONFUNDI POTEST? AN EADEM
UTRINQUE CAUSA, SIGNUM, PROPHYLAXIS ET MEDELA?

IN nostro thesis argumento, agitur de duobus, quorum prius est alterius conclusio. Itaque causæ, signa, prophylaxis et medela, primò putredinis nosocomialis, deindè gangrænæ nobis sunt examinanda : posthæc, unam cum alterâ comparabimus ; et ex istâ comparatione orietur solutio quæsitæ : an putredo nosocomialis cum gangrænâ confundi potest?

Antequàm incipiamus, nostrum non esse dicemus, investigare omnia quæ ad putredinem nosocomialem aut ad gangrænâ pertinent : paucis solummodò has affectiones describemus, ut eas inter se possimus comparare.

De Putredine nosocomiali.

Putredo nosocomialis, cui quoque gangrænæ humidæ nosocomiorum nomen, vulneribus et ulceribus propria est; cujus signa sunt : dolor acerrimus, partium vicinarum tumor, puris saniosi, cinerei, glutinosi, fetidi segregatio, vulneris aut ulceris incrementum.

De putredine nosocomiali non disseruerunt veteres. Attamen, ut censet Doct. Lèveillé, vulnerum cancer de quo Celsus loquitur, putredini nosocomiali congruere potest. Inter se quoque conveniunt sordida, putrida ulcera quæ a Guy de Chauliac describuntur, et gangrænâ humida nosocomiorum : idem dici potest de putredine quâ, cum urbs Rothomagus obsideretur anno 1562, vulnerati affecti fuerunt, putredo quæ, ut ait Ambrosius Paré, nec gregariis militibus, nec proceribus, nec principibus ipsis parcebat.

In hâc materiâ, primus versatus est ex professo celeb. Pouteu.

Posteâ quidam alii idem opus susceperunt, et majorem minoremve utilitatem scientiæ et ægrotis attulerunt.

Causæ. Putredinis nosocomialis multæ enumerantur causæ. Inter quas nosocomiorum situs insalubris, aer pestilens propter nimiam in eodem loco ægrotorum multitudinem, propter gangrænâ vitiatos, febre typhode correptos, aut propter aliud ejus modi, cælum nubilum, frigidum, electricitas, quidam venti, lunare lumen, squalor, raræ curationes, quorundam unguentorum usus, irritatio allata ossium fragmentis a vulnere non extractis, aut violentis istorum fragmentorum tractionibus, contusio nimia, stupor localis, frequens vulnereum sclopetariorum comes, cibus et remedia corpus effringentia, concoctiones non absolutæ, febres mucosæ, præsertim typhus, hemorrhagiæ, sudores, suppurationes diuturnæ, nostalgia, etc., etc.

Quidam affirmaverunt putredinem, de quâ agitur, præter omnia eligere vulnera sclopetis illata, et plagas in membris inferioribus sitas.

Nobis examinandum est paucis verbis quid valent hæ variæ causæ.

Putredo in temperaturis maximè contrariis observata est, à decimo quarto gradu infrà 0 ad trigesimum quartum suprâ; in Alemaniâ, in Franciâ, in Hispaniâ, in Italiâ, etc.; per æstates fervidas et hyemes perfrigidas, per autumnos et vera tùm arida, tùm pluvia.

Haud dubia videtur vis electricitatis. Non rarò fit, ait professor Richerand, ut gangræna humidanosocomiorum appareat tempore procelloso: quod animadverti, inquit, quum mane me conferrem in nosocomium Sanct.-Ludov. quando, nocte antecedente, ægrorum somnus, tonitru et fulguribus, fuerat perturbatus.

Quorundam ventorum vis non eodem modo probatur: afflante aquilone, austro, vento torrido, frigido annotata est putredo, et forsàn sæpiùs quàm afflante imbrifero.

Aliquot sunt Chirurghi qui putaverunt putredinem, quæ Madriti sæviebat, mense januario, anno 1810, lunâ plenâ exasperatam fuisse. At aliæ possunt afferri causæ quibus increvit, et phasibus lunaribus antecedentibus, eadem non acciderunt.

Squalor, parùm frequentes curationes, vulnera nimium aëri exposita, unguentorum vel irritantium vel debilitantium usus, fragmentis ossium allata irritatio, aut tractionibus violentis, sunt totidem causæ quæ, quamvis nobis non sufficientes videantur ad pariendam putredinem, possunt tamen ei aliquo modo favere. Idem dicemus de cibo et remediis debilitantibus, de hemorrhagiis, sudoribus, suppurationibus diuturnis, et de nostalgiâ.

Vehementes commotiones, stuporque localis vulnerum sclopetariorum, minùs valent quàm dictum est, ad putredinem producendam. Re ipsâ, ut ait Doct. Ollivier, solùm evenit, quandò vulnera jam non sunt recentia et quandò stuporis effectus jam diù evanuerunt.

Constat putredinem nosocomialem, præter omnes, eligere plagas sclopetis illatas et vulnera quæ in membris inferioribus sedent; quod in dubium revocari nequit, quodque non pertinet ad putredinem: plagarum sclopetis illatarum, plagarum in membris inferioribus sitarum sanatio magis diuturna est, et ideò diutius vulnera ad causas putredinis sunt objecta: undè gangræna humida magis frequens.

Situs nosocomiorum in locis humidis, non longè a fluviiis, ut sentiunt præ cæteris Clar. Pouteau et Desault, est causa maxima putredinis: ad hanc causam celeb. Desault referebat morbi frequentiam in nosocomio parisiensi, cui nomen *Hôtel-Dieu*. Non negamus quod de nosocomiis fluminibus et locis humidis appositis, dictum est; nihilominùs, non semper fuit putredo frequentior in valetudinariis fluvio appositis: aliquandò quidem evenit ut sæviret in valetudinariis magis remotis, dùm istis parceret. Prætereà, aliquoties magna fuit vis gangrænæ humidæ in nosocomiis in altitudines editis, et in locis humido carentibus.

Aër vitiatus propter multitudinem ægrorum congestorum in locis angustis et cœlo patenti non expositis, propter ægros gangrænâ aut febribus typhodibus inquinatos, etc., uno modo propter quemvis alium fetorem, multò magis idoneus est ad producendam hanc putredinem.

Etenim, his omnibus variis, de aëre vitiato dictis, simul connexis, tunc apparet putredo nosocomialis pessima, lethifera.

In nosocomio, cui nomen Charitatis est, vulnerati cubantes in octo vel decem lectis continentibus cum valetudinario ubi jacebant ægroti febre adynamicâ tentati et moribundi, ferè semper, ait Clar. Deschamps, putredine nosocomiali correpti erant.

Quidam vulnerati, hoc narratur à professore Delpech, qui aderant in nosocomio sancti Eligii-Montis-Pessulani, collocati fuerunt in locis parum lucidis, qui habebant facilem aditum cum aliis valetudinariis plenis ægrorum typhode nosocomiali vitiatorum; tunc ferè omnia vulnera huic contagioni exposita, in putredine summâ facta sunt. Simul observabat professor Broussonet typhodem fieri frequentiore et graviorem in locis continentibus vulneratorum valetudinariis.

Professor Delpech observavit quoque putredinem nosocomialem produci posse miasmatibus gangrænarum propriè dictarum, et emanationibus dyssentericis.

Gangrænâ humidam nosocomiorum sæpè à gastricâ colluvie, à febre mucosâ, biliosâ et præcipuè typhode produci, quidam existimârunt. Quæ quidem opinio valet adhuc apud peritissimos.

Pro certo habemus putredinem nosocomialem posse cum his morbis coexistere: at hi morbi producuntne putredinem, an sunt tantum cum putredine coincidentes, ut putat professor Delpech, qui vidit putredinem modò antecedentem, modò sequentem alios morbos. Idem professor asserit se vidisse ægros colluvie gastricâ, febre biliosâ, catarrhali aut typhode liberatos, et tamen hæ sanationes non multum valuerunt ad gangrænâ humidam tollendam. Hæc affectio quam existimat esse cujus vis alius alienam, nocet,

inquit, morbis qui ad eam se jungunt, et si putredo remediis vinceretur, statim alii morbi mirum in modum in meliùs veniebant; quod sæpè vidit.

Qui aliter sentiunt, qui putredinem nosocomialem morbo generali produci putant, hanc opinionem certis rationibus non confirmant: itaque nobis liceat sentire cum professore Delpech, donec, argumentis firmioribus, de istà sententià deducamur.

Putredo nosocomialis sporadica est aliquandó. Vertiturne in contagionem? Hâc de re aliter alii censuere auctores.

Clar. Pouteau, et post hâc plurimi auctores asseruerunt putredinem transmitti posse instrumentis et linteis quibus ægri, isto morbo affecti, curati fuerunt. Nihil de hoc modo transmissionis dubitandum putamus, et, in opusculò professoris Delpech, plurima leguntur facta quæ illum certissimè probant: similia quædam indicantur a doctore Ollivier; et in nosocomio Charitatis, putredinem ab ægro ad ægrum alium transmissam vidimus à chirurgico tyrone qui utrumque curabat.

Inoculari potuit putredo nosocomialis, et quomodo doctor Ollivier hanc in seipso excitaverit, haud fastidiosè legetur.

Nihilominùs, Clar. professores Richerand et Percy, hanc contagiosam esse negant.

Enarrat doct. Thomas professorem Dupuytren pus ab ulcere, quod putredo nosocomialis vitiabat, inseruisse vulneri roseo, nec quidquam mali indè evenisse ei qui experientiam patiebatur.

Professor Richerand testificatur se haud semel quasdam guttas puris quæ puris ex hâc putredine stillantis, vulneribus et ulceribus injecisse, ullâ sine istius tabis notâ. Tandem Doct. Percy et Laurent argumentationibus plùs minùsve certis contra vim contagiosam putredinis nosocomialis, seriem addunt experimentorum quæ nihil ad vulnera contaminanda valuerunt.

Quanquàm afferantur tantæ auctoritates, non possumus non agnoscere vim contagiosam putredinis nosocomialis. Quæ vis cer-

tis demonstratur factis, et Chirurgi, de quibus verba fecimus, non putredinem inoculare potuerunt certè quòd non sàt sæpè id tenterunt, vel quòd eis temporibus et in eos qui tunc extra morbum èssent, experimentis data fuerit opera.

Non solùm per contactum animadvertitur putredinis transmissio : nempè professor Delpech sæpiùs observavit eam semper inquinare vulnera, ægri ita affecti, proxima. Ideòque, si quis, putredine contaminatus, in vulneratorum valetudinarium admittitur, mox diffunditur morbus, primùm vulneratos proximos invadens, et indè usque ad remotissimos pervadit.

Per aerem transvehi facilè videtur hujus contagionis principium, quod sæpè impeditur, lectum ægrotantis involvendo atmosphærà chlori, adhibitis capsulis fumigatoriis continuis.

Ut manifestetur putredo nosocomialis, necessaria est solutio continuitatis. Attamen Doct. Ollivier hunc morbum cicatricibus novis accidisse refert.

Eò faciliùs apparet putredo, quòd liberiùs, vel aere infecto, vel linteis aut instrumentis, tangi possunt vulnera, et in plagis quæ membrum hinc et indè transmeant, semper ab oris incipit.

Quidam asserunt rarissimè putredinem invadere vulneratos aliòque sanos. Videtur tamen non magis eis parcere quàm ægris quocumque morbo affectis. Cæterùm non in eodem loco inclusis omnibus vulneratis deprehenditur.

Symptomata. His signis agnoscitur in vulnere, putredo nosocomialis : doloribus plùs aut minùs acribus opprimitur æger; minuitur suppuratio, et fit serosa; brevi in superficie vulneris, quod antea roseum erat, apparet humor glutinosus, subalbidus, semipellucidus, qui, a professore Delpech, existimatur pseudo-membrana, cujus sensim crescit crassitudo, et fit ferè similis puri; attamen auferri nequit et movetur tantùmmodò substantia mollis, pulposa, subalbida, quæ maximè, partibus subjacentibus, hæret : nonnunquam fit ut hæc substantia sit subrubra; et, in pluribus locis, sanguinolenta.

In omnes partes interea, tum in latitudinem, tum in altitudinem augetur plaga; hujus orae majorem afferunt dolorem et invertuntur; œdemate vel etiam emphysemate afficiuntur; stillat maxima copia puris saniosi, fetidi, cujus fœtor sui generis; omnes partes vicissim destruuntur, et abeunt in formâ eschararum mollium, substantiæ pulposæ, homogeneæ, albidæ, aliquandò sanguine striatæ, dum morbus seu naturâ seu arte vincatur.

Non semper ea sunt putredinis nosocomialis initia: aliter incipere potest, nempe hoc modo: alia phænomena semper antecedit dolor; at in loco qui affert dolorem, ferè simul animadvertitur pars excavata, primò parum extensa, ferè semper rotunda, quæ circumscripta oris acutis et sublevatis. Hujus excavationis color est obscurior quàm totius vulneris color, cujus aspectus semper idem remanet; ora partis excavatæ præsertim sunt violacea; plena est ichore subnigro, tenaci, quod facillè auferri potest, è quo fœtor illi proprius exhalatur; tum ulcerationis tota cernitur superficies.

Hæc ulceratio modò est unica, modò plures sunt quæ in unam tandem cœunt.

Ut ut hæc sunt, morbus plerumque ingravescit, donec totum vulnus assecutus sit. Evenit quoque ut ulceratio totum, ab exordio, vulnus occupet.

Quandò ad hunc gradum pervenit morbus, rapidè undiquè serpit; ulcerationis fines sunt colore violaceo; idem color ad ora, et quidem ultrà, progreditur; ex eâ stillat pus ichorosum, subnigrum, sanguine striatum, fetidissimum. Nulla manent vestigia partium destructarum, nisi ichor.

Hæc sunt phænomena quæ ut plurimum observantur.

Nonnunquam fit ut malum sit omninò locale, dum reliquum corpus est in valetudine integrâ: at sæpius, quinto vel sexto die, doloribus turbatur quies, fastidiuntur cibi, lingua fit pallida et alba, epigastrium, quandò premitur, affert dolorem, corpus brevè

emacescit, vultus videtur tristis, dejectus, corporis temperies minor est quàm in habitu consueto, arteriæ pulsus est debilis; tandem, decimo vel duodecimo die, ut fit persæpè, æger in febrem incidit, et rarum est ut rigor eam antecèdat, nisi adsit complicatio; pulsus fit frequens, celer, at semper debilis; corporis calor major fit, cutis est sicca et pallida; levis adest cephalalgia, magnâ siti vexatur æger, sensim deficiunt vires; vespere febris exacerbatio levis subit. Si morbus semper ingravescit, tunc sopor fit; rarò ideæ delirio turbantur; oculi sunt semi-clausi; in magnum stuporem incidit æger, jacet supinus, ferè immobilis; pulsus fit frequentior et maximè debilis; plerùmque desinunt excretiones; moritur, aut potiùs, extinguitur æger.

Non semper habet exitum lethalem putredo nosocomialis; interdum, quinto, sexto vel nono die, evanescit, et phænomena generalia non obvenerunt. Nonnumquàm etiam, quamvis hæc phænomena obvenerint, fit tamen sanatio sive spontè, sive arte juvante, post tempus magis diuturnum, post quindecim vel viginti dies, post unum mensem: Interdum, in eodem statu, per plures menses remansit.

At quocumque tempore, si sanatio advenit, primò immittitur dolor, et brevè omninò desinit; pus fit magis album; ejus odor jam non est fétidus; ulcerationis ora deprimuntur, ejus superficies est minùs aspera; rosea fit: circulum subnigrum, ædematotum, qui eam circumdat, inflammationis veræ signa subeunt; simul febris se remittit, evanescit ardor, minor est agitatio et sitis minùs ardens; coloratur facies, oculi sunt minùs inertes, omnia sedantur, et solutio continuitatis ad primum statum adducta, brevè ad sanationem tendit, nisi, ut sæpè fit, vulneratus recidat in putredinem, cum sanatus videretur.

Fieri potest complicatio putredinis cum pluribus morbis et præsertim cum typhode nosocomiali. Quando de causis disseruimus, diximus hanc putredinem omninò alienam esse morbis quibuscum jungitur; diximus quoque hanc putredinem esse his

morbis noxiam. Illorum morborum incrementum modò antecedere, modò sequi potest.

Diagnosis. Nonnunquàm multæ nascuntur difficultates, et, ut putat professor Delpech, falsa funestaque theoriæ conditionis symptomaticæ hujus morbi; ex erroribus diagnosis, orta est.

Aspectus vulnerum in quibus adest complicatio morbi acuti, cum putredine nosocomiali non debet confundi. Horum vulnerum superficies siccatur, et formatur eschara quæ cadit quando solutio morbi acuti advenit. Ob colluviem gastricam, in vulnere formatur quoque aliquandò tenuissima eschara, quæ tantummodò superficiiei adhæret et quæ brevè solvitur.

Idem professor Delpech narrat se vidisse celeberrimum chirurgum parisinum qui accipiebat, pro putredine nosocomiali, vulnus contusum, in dorso manûs situm. Hoc evenerat quinque ante diebus; æger non labore desisterat, et vulnus male curatum fuerat, ita ut esset inflammatum et perfusum floccis albidis, sanguinolentis, quos effecerat putrefactio cutis emortuæ. Indè erroris causa.

Putredo nosocomialis adhuc confundi potest cum vulneris ecchymosi. Quiquidem error facile vitatur, si animadvertitur, semper in putredine excavatio plus aut minus profunda, quod non invenitur in ecchymosi.

Ad distinguendam putredinem nosocomialem à quâvis aliâ affectione, necesse est ut adnotetur dolores, plus vel minus acutas, in solutione continuitatis semper antecedere alia morbi phænomena, et mutationes, de quibus diximus suprâ, sequi statim eodem dolore.

Prognosis. Periculum putredinis nosocomialis varium est, pro variis circumstantiis in quibus manifestatur. Hæc complicatio vulnerum ut plurimum gravis; semper impedimentum affert sanationi solutionum continuitatis: in hoc solo est noxia, quum aggredditur vulnera simplicia, parum extensa, et quum vulnerati sunt benè valentes et optimâ corporis habitudine.

At si putredo incidat in solutiones continuitatis latè patentés, non recentiores, tunc magno potest esse detrimento, et periculum augebitur, si vulnera sita fuerint in vicinia partium ad vitam magis necessariarum, in proximo trunci, arteriæ majoris, etc.

Interdum putredo nosocomialis occupat leve vulnus, deinde in totum irruit membrum, quod sensim consumit, in articulationes se insinuat et producit mortem, sive dolorum vi, sive frequentibus et abundantibus sanguinis profluviis. Nunnunquam autem ægri, consumptione, vel accidentibus generalibus e putredine ortis, pereunt.

Eò gravior fit putredo, quòd incidit in ægros magis debiles et habitudine magis vitiatâ. Ejus effectus sunt maximè perniciosi apud ægros scorbutò corruptos.

Minus exitiosa putredo sporadica, quàm epidemica. Hic morbus exasperatur commoratione ægrorum in locis ubi originem duxit, et quando supersunt causæ qui eum prodixerunt. Vel augetur, vel minuitur periculum, prout istæ causæ plus minusve valent; indè nascitur cujusque epidemiæ sævities.

Prophylaxis. Quæ cum sint nosocomialis putredinis causæ, natura pestifera, propagationisque modus, facillimè judicatur morbum hunc vel avocari, vel in progressu cohiberi posse, quando jam existit.

Frequentissima, fortassè evidentissima causa huic morbo assignari potest, scilicet: aëris vitiatio, sive coitione multorum hominum in locis humidis, insalubribus, in ædibus cælo malè apertis producta, sive exhalatione ægrotantium gangrænâ tabidorum, morbis putridis, dysenteriâ, etc., laborantium. Vitandæ sunt igitur aëris corruptionis causæ, et si omninò vitari nequeant, permagni saltem interest vim malignam moderari, nosocomiorum munditiem servando, ventulum novum, quoties cumque necesse est, faciendo, vapores nitri vel chlori suscitando.

Maxima equidem cura adhibenda ad avellendas causas præparatorias. Idcirco, cibus salubris, quantum opus est, adminis-

trandus, subacidâ potione, generoso vino cum magnâ moderatione utendus : non minor habebitur et ratio et diligentia exquisitæ munditiei, tum corporis, tum vulneris, curationis admodum iteratæ : removenda sunt etiam unguenta, plagarumque superficiem, non diuturno tempore, nudam, impressio aëris ambientis afficiet.

Accuratè scrutari debent abdominis viscera; si superveniunt quædam gastricæ aut intestinalis colluviei signa, statim adhibeatis medicamenta seu vomitoria, seu cathartica; prius, quam potus amari, vel subaromatici prescribantur.

Putredine nosocomiali existente, jamjam notati prophylaxis modi, summâ utilitate insignes, qui propagationi impedimentum afferant.

Ne quid magis dicam, hæreat semper animo hujusce morbi virtus pestifera; quam facillimè, non modò de manu chirurgi, de instrumentis, de linamento, de linteo, sed etiam de vehiculo aeris transmittitur. Vestimenta equidem, plurimis confitentibus factis, sæpiùs contagionis principium, in locum nondum contaminatum, attulerunt. Itaque non nimis commendabitur mundities manuum, instrumentorum, renovatio frequens linamenti et linteorum, adeò ut nunquam bis inserviant, etiam si diligenter mundata fuerint. Non ægrotantes linamentum conficiant (Pouteau), nec plagis imponetur ante quam chlorigas vaporibus fuerit subjectum (Delpech). Præcavere utile est, ut linamenta simul et lintea, procul ab ægrotantibus removeantur, ut à cæteris, putredine nosocomiali laborantes, sejungantur. Si fieri nequeat discessus, lectum ægrotantis, capsulis plurimis suffitus chlorigas mittentibus, circumdate : hoc ipso modo, professor Delpech contagionem cohibuit : istâ agendi ratione, chirurgi vestimenta aere pestifero minus imbuta, non aliò contagionem transmittunt.

Quandò, præsertim in valetudinario, grassatur putredo, summa cura adhibenda ne plagæ nondum infectæ, sæpissimè detegantur, vel diutiùs denudatæ maneant.

Medela. Putredinis nosocomialis medela, modò topica, modò generalis.

Nedum plurima medicamenta topica, multis jamjam abhinc annis proposita, artis medicæ splendorem denuntient, inopiam contrâ confirmant: si quædam etenim effectus certos habuissent, cætera in oblivione venissent.

Plurima equidem remedia, præcipuè antiphlogistica ant anti-septica, dubios assecuta sunt effectus: non singula pensare licet; pleraquæ inertia sunt, aut tantum doloꝛem incitavêre, ut mox derelicta fuerint.

Ex omnibus remediis commendatis, meritam obtinuit famam acetum. Multoties répétita facta, hujus remedii præstantiam, professori Delpech demonstraverunt. Præcipuè incipiente morbo, infectionis latitudine depressioneque circumscriptis, atque ulcere putrido nondum tenaci et crasso pure induto, acetosis ablutionibus et topicis sæpè putredo evanuit, aut saltem minores peregit progressus. Acida vel citrei, vel sulfuris, vel nitri, vel chlori, aquâ plus minusve diluta, eadem virtute præstant; unguentum ægyptiacum non immeritam quoque laudem consecutum est.

Hæc omnia remedia ferè omnino irrita, cum purulenta cuticula ulcus induerit, nisi, professori Delpech exemplo, antequam apponantur topica, plaga expurgetur, et frictiones cum aspero crassoque linteo adhibeantur, quæ materiæ pulposam, hærentem atterant, planèque destruant; tunc in ulcere sic cruentato, ex aceto effuso, sicut et ex cæteris acidis, insolitus nascitur dolor. Remedium partes vivas afficit.

Si non omnino destructa fuerit pseudo-membrana, forsàn putredinis progressus sistent; sed ad felicem exitum non eveniet morbus; certissime post aliquot dies revertetur, sicut rerum experientia confirmavit. Idcirco, aceti et cæterorum acidorum utilitatem restrictè confiteamur.

Pulvis carbonis, inferiori virtute præditus, si medicamentis, de quibus jamjam locuti sumus, conferemus: attamen existimatione

floruit, modo ut in iisdem casibus, cumque sedulâ eâdem curâ, adhiberetur. Factorem puris discutere, inter præcipua hujusce remedii comoda, professor Delpech annotavit.

Carbonis ignescentis vaporem quidam laudavêre. Itaque ulceri imponebant crustam similaceam fermentescentem, quæ vaporem continuum effundebat. Ista verum agendi ratio reprehensione digna: vim etenim mali accendit, materiei putridæ effluvium cohibendo.

Non minus laudatus corticis peruviani pulvis. Haud certi sunt hujusce pulveris felices effectus, siquidem, ad rem dijudicandam, respiciamus experimenta, in posterioribus gangrænæ humidæ epidemiis, tentata. Etenim, sub crustis peruviani corticis, crescere, atque etiam malum ingravescere, semper visum est.

Ut ulceri sordido imponatur crusta vel quatuor, vel quinque lineis crassa, pulveris cinchonæ, oleo e terebenthinâ madefacta, suadet doct. Dussaussoy. Mox crusta siccat, friabilis fit, et viginti quatuor post horas, haud difficilè remota est; eadem medicatio statim renovanda. Sibi non semel utilissimum fuisse remedium, refert Dussaussoy, præcipuè cum morbus levis, et in principio esset. Sed cum res ita sint, haud rarum est agrotum spontè e morbo evadere; vidit etiam, idem Doct., illud remedium nullum felicem exitum habere.

Minimo auxilio est iste pulvis, et, quod pessimum est, in ulceris superficie materiam putridam retinet, undè in pejus ruit putredo.

Inter omnia quæ, contra nosocomialem putredinem, proposuerunt medicamenta topica, solummodo verè præsentissima caustica. Sistit putredo, cum destruuntur partes vitiatæ, partes quæ, ut ait professor Delpech, principium morbi occultant.

Quamobrem, quidquid adurit adhibitum fuit: aliquandò auxilio est nitras argenti, cum putredo levis est et parum alta. Huicce caustico parum confidas, sicut et acidis metallicis, quæ sæpissimè cum purè vulneris superficiem operiente, se miscent,

nec usque ad partes vivas perveniunt. Quòd si aliquandò illis uti necesse est, sicut antè usum aceti, planè destruenda est materies tenax, pulposa.

Inter omnia caustica multum præstat ignis, tùm certo, tùm rapido effectū. Ut plurimùm satis est semel comburere, præcipuè cum ignis illicò destruit omnes partes vitiatas. Certè prænuntiari potest sanatio, quotiescumque, intra viginti quatuor horarum spatio post adustionem, dolores, è putredinè orti, evanescent. Escharæ siccitas certissimè comprobatur omnino et prorsus deletam esse luem. Sæpissimè iterum urendum est, si minima pars ulceris adhuc humida sit.

Aliquandò necesse est plus minusve incidere, ut igne totum malum persequatur. Haud timida agendi ratio sæpè felicem habet exitum, sicut videmus in professoris Delpech opusculo.

Quidam avellere escharam suaserunt, ne mali principium servet, et illud in contactu reponat cum partibus sanis. Etenim aliquandò accidit ut iterum appareat putredò nosocomialis simul atque ignis eschara solvitur. Iteratum malum alià causâ essetne productum?

Cæterum minimè semper facilis et sine dolore, escharæ avulsio. Magis innocua est agendi ratio, et recidivo morbo occurrit, professor Delpech, linamento aceto imbuto quod escharas circumdabat; non semel quotidie, eodem aceto, humectabat linamentum.

Aliquandò cauterium vidit non satis altè penetrans, professor Delpech, propter nimiam vulneris humiditatem: tunc, cum felice exitu, adhibuit potassam causticam, sicut infra explicatur. Fragmentis angularibus potassæ totam partem infectam configit, donec guttulæ sanguinis effluerent; hinc crassa eschara cujus solutio, roseum vulnus ostendit.

Amputatio, extremum remedium quoque propositum ad sistendam putredinem nosocomialem. Quando convenit, semper supra

mali fines efficienda est; aliter inutilis fit operatio, propter iteratam putredinem in extremitate mutilati membri.

Putredine nosocomiali sanata, nullas curas præcipuas requirit plaga. Omni ope et operâ entendum quin malum redeat.

Nunc aliquid de medelâ generali dicendum.

Minimè credimus putredinem nosocomiorum à morbo generali productam; contrâ, persuasum habemus localem esse: præsertim in medelâ locali, omnia medicamenta versantur. Si putredinem subsequuntur generalia phænomena, ab iisdem remediis et putredo et phænomena cohibentur.

Famis usus, potus aciduli et diluentes, putredine nosocomiorum laborantibus optimè conveniunt. Corticis peruviani ingestio laudata fuit; sed, in principio morbi, nimium irritat ægros, et diarrhææ funestæ ortum dare potest. Tantum modo utilis est cum, senescente morbo, dolorum acritas, persecutio, puris magna copia, aut forsitan materiæ putridæ absorptio, in atoniam et debilitatem, ægrum adduxerunt.

Præsertim maximè prodest cortex peruvianus cum, sanata putredine, illi superest summa debilitas, undè mors evenire potest.

DE GANGRÆNA.

Gangræna cujusdam partis mors est. Hæc vox *gangræna* non semper habuit hunc sensum. Galenus, et posthac plurimi auctores, hac voce usi sunt, ad significandam cuidam corporis partim mortem imminentem.

Deindè, illâ voce designata est mors partium, in superficie sitarum, tegumentorum; sphacelus verò nominabatur mors totius membri. Quæquidem distinctio nihil valet.

Gangræna quoque sicca et humida dicitur, pro redundantia aut paucitate fluidorum in parte mortuâ.

Causæ. Nullæ parti gangræna parcat. Multis causis modò externis, modò internis, produci potest.

Externæ causæ sunt inflammatio , contusio , combustio , congelatio , motus fluidorum impeditus.

Gangrænæ causa frequens, inflammatio , vel intensitate, vel malignitate.

Gangræna ab inflammatione intensâ producitur, propter fluidorum accumulationem vel motûs impeditum in aliquâ parte. Circulationis fluidorum impeditus sæpissimè oritur ex tumefactione impeditâ ab aponeurosibus , cæterisque vinculis fibrosis : partes subjacentes opprimuntur duabus viribus quæ , dissimili modo, agunt , scilicet : affluxus et status fluidorum qui amovent ex interiore ad externis , et renixus aponeurosium qui exteriore ad internis repellit.

Quesnay, hoc in casu aponeuroses agere vi propriâ , putabat, contrarium probatur.

Contusio, sicut inflammatio, duobus modis affert gangrænam : vel atterit partium structuram, vel earum actionem organicam adeò minuit, ut mors indè sequatur.

Prior modus sat perspicuus est. De altero aliquid dicamus : mors partes contusas invadit, non quia partium actio organica, maximè debilitata, se se sensim extinguit, sed quia affluxus abundans fluidorum fit in partibus debilitatis : hæ partes, quæ nullo modo fluidis possunt obsistere, distenduntur, undè fit ut alteretur, deleatur eorum structura.

Si principium caloris, cujuscumque modi satis collectum, corpori admotum fuerit, pars læsa subito vitâ orbatur et in nigram aridamque escharam convertitur. Gangrænam quoque afferunt quædam substantiæ, nomine causticæ ; partes destruunt per contactum plûs minûsve diuturnum , et similes combustionis haberi possunt.

Si caloricum abest, non minus est periculum ; nam frigus producit aliquandò gangrænam, sive coagulatione fluidorum, quorum motus impeditur, sive minuendo, sive delendo solidorum actionem organicam, et sensum hebetando.

Vel ligaturâ, vel compressione vasorum, impeditur fluidorum motus. Utuntur ligaturâ, nonnunquam et compressione in sanatione aneurismatis aut arteriæ vulneris. Aliquandò fit quoque ut totum membrum vel aliqua pars comprimatur. Clar professor Bôyer exemplum refert sphaceli cruris, cujus occasio fuit fascia quæ membrum valdè stringebat.

Herniarum strangulatio nobis præbet exemplum compressionis circularis et localis.

Per fracturarum curationem, aliquandò apparent escharæ in locis membri qui nimium ferulis comprimuntur, et in partibus quibus perdiu æger incubat.

Professor Boyer narrat se vidisse mentum et os maxillæ inferioris gangrænâ vitata, apud mulierem cujus muscoli posteriores colli erant resoluti, undè pressio menti in thoracis partem superiorem.

Quod nobis dicendum est de causis internis gangrænæ non tam perspicuum est quàm quod ad causas externas pertinet.

Sæpè gangrænæ causâ nihil aliud est nisi natura inflammationis, malignitas, sive, ut evenit in pustulâ malignâ, hæc malignitas quæ in principio localis est, totam corporis œconomiam inquinat, sive, ut in anthrace, hæc malignitas primò in toto corpore disseminata, unam tantum partem deindè afficiat.

Adhuc habenda est ab internâ causâ gangræna quæ supervenit aliquandò per febres putridas, quæ quidem invadit partes antea inflammatas, aut feбри finem facit, modo critico, delendo partes quas vitatura non videbatur.

Causa gangrænæ certa est, secalis cornuti usus.

Tandem est quædam gangræna, cujus causam dicere, difficile foret: senilis nominatur. Hujus gangrænæ senectutem et virium defectum occasionem esse putant. Nonnunquam adest cum aneurysmate cordis, aut cum osseâ præcipuarum arteriarum induratione. Hoc autem verè dici potest, causam illius morbi esse sæpè ignotam.

Eæ sunt quæ paucis dicere volumus de causis gangrænæ.

Signa. Varia sunt gangrænæ phenomena, pro variis causis.

Cum intensam inflammationem gangræna sequi debet, immineunt dolor et calor, prout major fit tumefactio, quodquidem septimo vel octavo die accidit: pars gangrænâ affecta frigescit; collabitur tumor; color ruber brevi mutatur in violaceum, in nigrum; sensus aboletur; carnes sunt densiores; cuticula solvitur, apparent phlyctænæ sero subnigro plenæ.

Si gangræna proximè evenit à contusione violentâ, eschararum solutionem solummodò comitantur phænomena de quibus verba faciemus infrâ.

Si autem contusio gangrænam adducit, partes debilitando, tunc supervenit tumefactio vel plùs vel minùs magna, aliquando sanguinis extravasatio: simul color et sensus evanescunt.

Quum corpus maximè calidum cuidam parti admovetur, hujus partis structura statim destruitur; tunc eschara, modò sicca, modò mollis et humida, cujus varius est color, pro caloris gradu et naturâ corporis urentis. Sæpè multæ phlyctænæ, sero limpido plenæ, escharam circà observantur. Eundem agendi modum habent substantiæ causticæ.

Propria phænomena pertinent ad gangrænam à congelatione: Primùm, in partem frigori expositam sævit dolor, aut major aut minor; pallescit hæc pars, et jam moveri facilè nequit. Si majus fit frigus, tùm nullus est dolor; sensus hebetatur; motus abit, sensim tardior est fluidorum progressio, color partis lividus; vita discedit simul atque congelantur fluidi. Frigus eodem modo totum corpus congelare potest; tunc somnus arctus et ferè invincibilis morti prægreditur.

Sequentia observantur, quando ligaturam arteriæ cujusdam membri præcipuæ, sequitur gangræna: membrum sensim frigescit; fit grave, oedematosum; minuitur sensus, pulsationes arteriarum cessant; brevè cuticulæ desquamatio, color lividus, subviridis.

Gangræna ab internâ causâ, nonnunquàm erysipelatis speciem

habet; mōx, magis saturatus color; calor, dolor et quidem sensus evanescent; frigida est pars cui imminet gangræna, firma, densa, maculis nigris tecta.

Evenit quoque ut gangrænam præcedat maxima tumefactio, quam sequuntur calor, tensio et dolor, mōx refrigeratio et insensibilitas. Rubor inflammationis vertitur in colorem nigrum, plūs minūsve saturatum.

Tandem, ut in pustulâ malignâ, aliquando prurigo mordax, in uno cutis loco, gangrænæ imminentiā denuntiat: ibi parva vesicula, sero plena, manifestatur; paulò post in cute apparet tuberculum durum, complanatum, insensibile, quod areola plūs minūsve rubra circumdat. In areolâ disseminantur parvæ phlyctænæ. Quod tuberculum, textum cellulare invadit, indè oritur nucleus durus, gangrænâ vitiatus, cum tensione et tumore.

Non semper eadem sunt signa gangrænæ senilis: idem dici potest de gangrænâ ab usu secalis cornuti. Modò, imminente gangrænâ, pars fit frigida; nihilominus, æger, sensum caloris urentis, percipere potest; interdum, nullus adest dolor; tantummodò gravitate, torpore et frigore tolerabili, quæritur æger.

Cum gangræna in limine adest, pars fit rubra; nulla tensio, nullus calor. Rubor brevi obscuratur et in lividum, deindè in nigrum, mutatur: qui rubor semper gangrænam antecedit. Escharæ senilis gangrænæ sunt persæpè nigrae. Aliquandò accedit ut crustulæ sint pallidæ aut albidæ, et tunc gangræna dicitur alba. Rarò phlyctænæ gangrænam senilem comitantur.

Quæcumque sit gangrænæ causa, mox putrefactio in partes mortuas irruit: quandòque tamen, nec dissolvuntur partes, nec mutantur in nigrum aut viridem, nec destruuntur, nec diffluunt in fluidum crassum, nigrum et maximè fetidum, nec dilabuntur; partes verò gangrænâ vitiatæ exsiccantur et durescunt.

Utcumque ceciderit, afflatur ex gangrænâ odor fetidus, sui generis, cadaverosus, qui non potest non agnosci, si semel ad nares pervenit.

Quum gangrænæ sistit progressus, extremæ partes mortuæ quodam cinguntur inflammatorio circulo; cujus roseus color multum differt à colore subnigro, plerumque gangrænam præcedente. Tum manifestus est limes vivum inter et mortuum. Diffinitus; primò saniosum et rarum; deindè magis abundans et meliori naturâ. Partes mortuæ sensim secedunt à vivis, et inter eas major fit distantia; tandem, nullam jam habent inter se connexionem. Quæquidem separatio efficitur post tempus magis vel minùs diuturnum, pro gangrænæ extensione, naturâ partium mortuarum; et pro viribus ægri.

In his quæ suprà, tantum de phænomenis gangrænæ localibus, de phænomenis quæ in ipso loco mortificationis observantur, diximus. Nonnunquam in gangrænâ adnotantur phænomena generalia.

Quandò gangræna ab intensâ inflammatione procedit, et quandò partes vitæ maximè necessarias afficit, doloribus acutissimis insensibilitas tota succedit, pulsus, ex pleno, fit exiguus, debilis, frequentior, miser; magno torpore prostratus æger.

In gangrænâ à malignitate inflammationis; summa est virium prostratio; pulsus est exiguus, debilis; miser; sæpè æger delirio placido vexatur, vel omnibus alienus est; singultus et vomitus subeunt; tunc mors supervenit, aliquandò brevi tempore: quod adnotavimus post quindecim horas, apud puerperam, cujus totum membrum inferius dexterum, in illo brevi tempore, fuit gangrænâ vitiatum usque ad abdominis parietes.

In gangrænâ senili, sæpè nullus est ægri affectus generalis, si lassitudines et maximam pulsus debilitatem exceperis. Sistit morbus, et æger convalescit. Nonnunquam autem fit ut magis ac magis minuantur vires; tunc superveniunt delirium, sudor algidus, mors.

Lassitudines antecedunt gangrænam ab usu secalis cornuti; pallescit tota corporis habitudo, præsertim facies; obdurescit et intumescit abdomen; stupidus fit æger, et stupiditas crescit pro-

ratione progressus gangrænæ. Fæces maximè fetidæ sunt; corpus emaciat; tam debilis et exiguus est pulsus, ut vix sub tactum cadat; fit tamen fortior et frequentior, quândò dolores sunt acutissimi.

Gangrænæ progressus multas habent differentias, pro morbi causâ.

Sic gangrænâ ab inflammatione intensâ, ut plurimum septimo aut octavo circiter die apparet. Citiùs ociùsve apparere potest. Mox omnes partes inflammatas invadit: tunc ponuntur limites.

Gangrænâ à combustione, à congelatione, à contusione subito accidit, subito ad summum pervenit.

Gangræna ab impeditâ fluidorum progressionе, plus aut minus lentè evenit, modò intrâ aliquot dies, modò intrâ plures hebdomadas. Aliquandò fit ut progressus habeat magis diuturnos.

Gangræna ab inflammationis malignitate, sæpissimè, magno cum furore, progreditur, et nisi celerrimè sistat aut reprimatur, mors citò evenit.

Gangræna senilis, gangræna ab usu cornuti secalis, ut plurimum lentè progrediuntur, perennant. Rarissimè tamen fit ut, spatio aliquot dierum, ab extremo pede ad genu ventremque proserpat.

Diagnosis. Diagnosis gangrænæ haud semper facilis in omnibus morbi statibus. Potest confundi gangræna quodam cum statu, cui nomen est asphyxia localis. In hoc statu, sicut in gangrænâ, nullus sensus, nullus calor, nulla arteriarum pulsatio. Vitæ phænomena deleta videntur: post aliquot dies renascuntur, et erroris magnum esset periculum, si præmaturè iudicium diceretur. Curiosum asphyxiæ localis exemplum refert clar. Delamotte. Non rara hæc asphyxia, post membri arteriæ majoris ligaturam.

Si velis certam dicere diagnosim, ne festina. Expectare convenit cuticulæ desquamationem et odoris proprii, sui generis, emanationem de quâ jam locuti sumus, et quæ haud dubium putredinis indicium præbet. Putredo sola gangrænam denuntiat;

attamen cum gangrænâ, cujus est consequentia, non confundi debet.

Gangrænâ tandem pernotâ, difficile prætereâ est, quàm in altum descendet, augurari: quandoque hoc assequi volumus, necesse est ut exanimæ partes, usque ad carnem vivam, incidantur. Incisionum altitudo morbi fines demonstrat.

Gangræna quâ partes internæ vel viscera corripiuntur arduam aliquandò facit diagnosim. Hujusce exitus suspicionem habeatis, si asperrimi doloris amotiò successionem fecerit stuporis aut indolentiæ, arteriarum pulsûs exigui, debilis, creberrimi, virium torporis, inertiae aut singultuum, aut defectionis aut sudoris algidi.

Causarum de quibus gangræna evenit explorata notio, in modo curandi, utile sæpiùs affert consilium. Huic ergo rerum cognitioni summa investigatio adhibenda.

Prognosis. Gangrænæ prognôsis varia secundum morbi causas, detrimenta, organi emortui excellentiam viresque ægro-tantis. Utcumque se habent ista, gravem semper existimare licet morbum, in destructionem partes morbidas trahentem.

Curatio. Tria capita amplectitur gangrænæ curatio; 1.º malo, antequàm irrumpat, occurrere; 2.º si jam invaserit, remittere impetum; 3.º ad sanationem toto studio incumbere, processu antea inhibito.

Prophylaxis. Prophylactica remedia non eadem pro variis causis. Nùm acutissima inflammatio gangrænâ minatur, ad famis usum, ad phlebotomiam sæpissimè, quoad conveniet, iteratam, ad potus diluentes, abundantes, ad topica emollientia citò et obfirmatè confugiendum. An vero aponeurosis densa partes inflammatione laborantes coarctat, atque tumefactioni facit impedimentum, nec morâ largis profundisque incisionibus dividatur.

Gangræna à combustione, gangræna proximè à contusione, obvia medicamenta non patiuntur. Membrum autem contusum, si ingentem susceperit debilitatem, et gangrænæ invasio im-

mineat, adverso casui repentinè obviam eatis, discussoriis et frigidis topicis, et paucos post dies, cùm sæviet inflammatio, novam curandi methodum, id est antiphlogisticam adhibeatis.

Gangrænâ imprimis à congélatione, ut avertat, ars medica obtinuit. Cui tale impendit periculum, non subito et ex præcipiti membrum ignis in calorem proferetur: istius rationis agendi incautæ certissimam pœnam ægotans persolveret. Magni contra refert membrum, vel corpus frigore correptum, in aquam algidam immergere, seu nive cooperire, seu frictionibus niveis fovere, interea dùm alteras frictiones, non procul à regione quâ sedent organa circulationis, adhibemus. Eamdem viam curationis insistere oportet, donec lividæ et subnigræ maculæ evanuerint, torporque decreverit. Si nondùm omnino perierit principium vitæ, mōx ad calorem, ad sensum, ad ruborem carnes redeunt. Tunc solūmodo præscribendi fots cum spiritu vini, cum aromaticis, et frictiones cum pannis laneis calidis. Dùm laborem istum ad habitum corporis urgebimus, ut hauriantur cardiaca medicamina, præcipuè ammoniacum, præsertim valet.

Arteriâ præcipuâ cujusvis membri constrictâ, si gangræna immineat, fovere calorem, omnemque vel minimam compressionem vitare, necesse erit.

Gangrænæ à compressione obstabitis, omnia removendo, prout difficultas tulerit, quæ fluidorum motum impediunt.

Quid faciendū est ut vitetur gangrænâ à causis internis. Earumdem vis maligna naturaque involuta, nihil aliud nisi dubium, de methodo prophylaxi, medico permittit.

Sedulò cavere oportet ne comedatur secale cornutum.

Curâ diligenti gangrænæ senilis causas investigando, forsàn obviam ire licebit. Homo qui, jammultis abhinc annis, vino, ultra modum, utebatur, per plurimos menses gangrænâ identidem redeunte laborabat. Postquam, præclaro Lapeyronie suadente, in usu vini sibi temperasset, potionesque lacteas et aquosas

substituisset, felicem exitum habuit gangræna, et jam tùm non rursùs apparuit.

Medela. Cùm jam nata est gangræna, protinùs ad illam compescendam spectandum est, instando usu remediorum prophylacticorum in mali finibus : ea remedia frustrâ apposueris in parte mortuâ ; ibi nihil agere debent.

Quidam vitiatas gangrænæ partes scarificare, incidere volunt, ut ad vivum remedia perveniant. Solummodò autem putredini eschararum favent incisiones, tumefactionem partium quibus imminet gangræna, augent, producunt quidquid vitandum est. Hæc rejiciendæ sunt.

Si continuos progressus habet malum, quidam in vivum incidunt. Quod si actum est, renascitur gangræna. Minimè utilior cauterii in vivis applicatio.

In gangrænâ à compressione, ab impedito fluidorum motu, sublata causâ, tollitur effectus.

Aliquandò subitò sistere possumus gangrænæ à malignâ causâ progressus ; sic in anthrace et pustulâ malignâ. Hoc agitur excisione, aut, quod multò melius, ustione, sive cauterio, sive substantiâ causticâ.

Plerùmque vani sunt artis conatus, et omnia naturæ referri debent. Attamen in quâdam gangrænæ specie, cujus Pott primus locutus est, utilissimi fuerunt opii usus internus et fœtus anodini.

Partes gangrænâ vitiatæ statim putredine corripiuntur ; cujus putredinis fetidus, et ferè intolerabilis est odor, qui imminuitur remediis quæ sistunt putredinem. Vulgò emplastro styracis circumvoluta est eschara ; at hujus styracis resinæ odor graveolentiæ gangrænæ addit ; melius est condere partes pulvere corticis peruviani aut quernei : ad fœtorem delendum, nobis utilissimus esse videtur liquor vulgò dictus de Labarraque (chloruretrum calcii.)

Sibi proprio labore mortuum è vivo divellit natura : aliquandò tamen hanc solutionem adjuvare licet. Ab inflammatione everti-

tur eschara. Si partes vicinæ nimium calent aut rubent, emollientia topica desiderant, quibus benè suppuratio moveatur; verum si languescit inflammatio, aliquid eorum admovendum est quæ stimulant.

Utcumque, removendæ sunt escharæ simul atque secedunt, resecandæ particulas adhuc adhærentes, nunquam tamen usque ad vivum. Sic imminuitur pessimus odor. Omnino solutis escharis, nullâ præcipuâ curâ sanatur plaga.

Ita res se habent cum gangræna non magnam partium crassitiem aut latitudinem vitavit. Sed non semper naturæ committere licet partium mortuarum secessionem, quando, exempli gratiâ, tota membri crassities in sphacelum abit: sæpè æger diem supremum obiret, antequam solverentur partes, et si viribus exhaustus non periret, plaga inæqualis, deformis, curatu haud facilis esset.

Membrum extirpandum est, sed non prius quam certi vivum inter et mortuum definiti sint limites. In his limitibus secare convenit.

Huc usque solummodò de locali curatione gangrænæ locuti sumus. Haud semper inutilia sunt quædam medicamenta generalia, corroborantia, inter quæ adnotandus est cortex peruvianus.

In gangrænâ à causis internis, ex principio ad finem laudantur tonica, cardiaca.

Ut plurimum sustinendæ sunt vires in gangrænâ senili; aliquando tamen in victu temperantia non inutilis.

Specificum remedium gangrænæ corticem peruvianum habent Angli Chirurgi, quod, experti negant Galli.

Nobis paucis dicendum est de remedio à D. Pott laudatissimo, adversus quamdam siccam gangrænam, præcipuè observatam apud prædivites, scortatores, vino et gulæ deditos. Hocce remedium est opium, cujus tres quatuorve grana quotidie ingerenda sunt.

Plerique Chirurgi non unanimi judicio, in naturam nosocomialis putredinis consentiunt. An putredo gangrænæ modus haberi debet, an verò formâ habituque variis à gangrænâ differt?

Comparatio cujusque morbi de causis, de signis, de prophylaxi et medelâ incidere potest quæ nosmetipsos ad sententiam non errantem, sed argumentis obfirmatam, perducet.

1.° Non evenit putredo nosocomialis, nisi antea adfuerit solutio continuitatis.

Gangræna non tantum exulceratas, sed etiam sanas et integras carnes afficit.

2.° Aëris ambientis corruptio, pestiferæ emanationes, sicut antea experimento confirmavimus, unicam haud dubiam nosocomialis putredinis causam constituunt. Istâ tandem sæviante, morbum regenerant modò noxiæ de ipsâ exhalationes, modò pus virulentum ab ulcere secretum : putredo de causâ externâ semper oritur.

Multæ quidem causæ, tum exteriores, tum internæ, longè dissimiles, gangrænam afferunt. Anthrace, pustulâque malignâ exceptis, nequaquam vi contagiosâ gangræna pendet.

3.° Putredo nosocomialis exedit carnes quas in materiem mollem, pulposam, cineream congeneramque convertit : partes aliquandò consumuntur, nec reliquiæ supersunt quæ detrimentum confirmant.

Gangræna lethalem exitum affert ; sed partium textura perstat eadem, donec elementorum solutio putrida venerit.

4.° Magnoperè ars medica pollet ad putredinem nosocomialem evincendam ; nullâ ferè valet virtute, si gangrænæ nondum circumscriptæ, non verò pustulæ malignæ, curam atque operam conferat.

5.° Causarum discrimen, methodi prophylacticæ unicuique accommodatæ discrimen, apertissimè indicat.

6.° Gangræna consultò in partes laborantes inducta, putredini nosocomiali nonnunquam auxiliabitur. Nil exindè, quàm utrius-

que morbi methodus therapeutica discrepet, evidentius denuntiat. Propter et hanc causam, non omninò pustulæ malignæ putredo dissimilis.

Itaque non aliam putredinis nosocomialis speciem exhibet gangræna, nisi vivarum partium mortem; cujus et habitus et modus agendi et natura in utroque morbo valdè dissimiles.

Putredinem detritus, exanimatio verò partium gangrænam depingit.

Si cujusque morbi causas, effectus, gradum, curationem estimemus, summo discrimine uterque sejungi debet.

Pustula maligna sola et putredo non planè dissimilem visum exhibent, si tantummodò causis et curationi attendamus: ambæ etenim contagiosæ; pustula vero maligna solummodò ad contactum. Nil à curatione augurari licet; eadem quippe sanandi ratio causas non consentientes impugnat.

Maximè igitur, ex meâmet ipsâ sententiâ, gangræna cum putredine nosocomiali discrepat; et si rerum explanatio non prævaluerit, quæ opinionem firmat; si quidam, destructione partium hallucinati, unum et eundem morbum haberent gangrænam et putredinem nosocomialem, cur istis cancerum non adjungerent?

Quas ob causas, cum putredine nosocomiali non confundi potest gangræna.

FINIS.

